

Henk Timmer den ATIA News:

Inversionistanan americano ainda tin confianza den Aruba

ORANJESTAD(AAN)— Den ATIA News, Sr. Henk Timmer a publica un relato extenso y masha interesante relaciona cu cooperacion economico entre Aruba y Curacao y ta puntra si esaki lo ta posibel. DIARIO lo bini back ariba e articulo aki mas extenso, pero awe kier muestra ariba e parti caminda e ta papia di inversionistanan, bisando cu Aruba ta duna bon bini na inversionistanan local y di exterior.

Segun Sr. Timmer, tur hende cu ta familiar, esta cu conoce e situacion Arubano sa cu e demandanan di sindicatonan na Curacao no ta refleja opinion di comunidad Arubano, incluso e sindicatonan di Aruba.

Aruba ta duna bon bini na inversionistanan local y di exterior y sa cu un desarrollo acelera di economia di Aruba ta solamente posibel si sumanan grandi y hopi mas cu comunidad di Aruba por duna, lo ser inverti den poco aña.

Arubianonan lo mester ahusta nan mes na un nivel di bida substancialmente mas abao pa algun aña. Impuestonan mas halto, tanto directo, (Inkomstenbelasting) y indirecto (impuesto ariba gasoline, derechonan di importacion) lo ta necesario pa paga pa gastonan halto di nos gobierno.

Hasta despues di baha e burocracia, e sector di enseñanza cu ta masha costoso y e ayudo social

extensivo cu mester pa motibo di e rata halto di desempleo, lo requiri impuesto halto pa varios aña. No mester pensa mes ariba pidi comunidad ademas di tur esey pa contribui tambe na un fondo pa inversion y pa nan acepta un nivel mas abao ainda di poder di compra.

Despues di ceramento di Shell y e reduccion di entrada for di e sector financiero off shore, Curacao probablemente lo mester sigui un rumbo similar cu Aruba ta haciendo caba.

Esaki ta haci cu lo ta masha dificil pa no bisa imposibel pa sigui sugerencianan di sindicatonan di Curacao.

Impuestonan halto lo ta un "must" y pidiendo e

comunidad pa permitiu reduccion adicional di entrada pa un fondo di inversion lo no sona atractivo. Como resultado Curacao lo no tin ningun otro cos di haci cu promove inversion local y di estranheria ariba un base voluntario, manera a ser haci den pasado pero cu masha poco exito. Pa por tin mihor oportunidad e reglamentonan lo mester wordo liberaliza y no di otro banda.

Aruba ta ariba bon caminda cu tanto inversionistanan local (Sun Development Group) como inversionistanan estranhero cu ta activo cu varios proyecto nobo y extension di hotelnan existente.

Di Hulanda e grupo Bredero y KLM (via Golden Tulip Hotels) kendenan

ta inverti, y Divi Hotel cu exitosamente a introduci su accionnan ariba mercado di accion na New York logrando 8 millon dollar e aña aki como capital adicional y prijs di nan accionnan ta sigui subi.

Esaki kiermeen cu e 600 doñonan di accionnan di Divi Hotels tin masha confianza den Walter Wiggins, Roger Coster y e mas di 600 empleadonan di Divi Hotels, pero esaki ta muestra tambe cu despues di ciere di Lago, e inversionistanan americano ainda tin confianza den Aruba. Divi Hotels a caba di habri su Alhambra Entertainment Center y ya a cuminsa construi otro unidad, Divi Club banda di Divi Divi Hotel.

Henny Eman a introduci prome programa ariba plan di rescate

ORANJESTAD(AAN)— Segun lider di AVP, Mr. Henny Eman, awe ariba nos isla ta mira un tension grandi, hendenan sin speranza pa futuro y con ciudadanonan ta bandonando nos suelo. "Esaki no ta e Aruba cu nos conoce, cu nos kier, cu nos merece", el a laga sa.

El a duna di conoce cu AVP a visualiza for di aña pasa cu e direccion cu Aruba ta bay aden lo exige un planeamento racional economico financiero y a presenta su plan di rescate, basta ariba accion directo den e gobierno nobo.

AVP den e periodo cu ta bini lo trece dilanti tur e partinan di e plan di rescate el a laga sa y cu e opinion di e partido ta cu lo ta bon pa pueblo ta envolvi den cada paso di pensamiento cu a pone ariba papel y cu lo ehecuto despues di 22 di november., AVP ta spera cu e pueblo lo sigui durante e periodo cu ta bini lo sigui e partinan cu AVP lo trece dilanti y cu AVP

lo bin cu amplio aplicacion di detallenan cu tin den e plan di rescate.

Ayera anochi den un programa di television di AVP Mr. Henny Eman a cuminsa cu un introduccion ariba e plan aki.

El a muestra ariba e partinan importante di e plan en general, e proyectonan cu AVP kier realisa den e cuater añanan nobo di gobernacion.

Masha optimista di un victoria di su partido den eleccion venidero, el a splica con lo ehecuto e plan di rescate.

E plan lo ser treci pa e pueblo den programanan regular di e partido.

Den lineanan grandi el a pasa ariba e sector di turismo, sector industrial y financiamiento di proyectonan pa nan realizacion.

El a laga sa cu recurso humano ta e parti di mas importante pa por realiza un plan di rescate manera AVP tin.

Lider di AVP a papia di suficiente especialista

cu tin na Aruba pa por ehecuto e plan aki y si no tin suficiente e partido a

habri e posibilidad cerca ministro hulandes pa re-educar nos hendenan pa

ehecuto funcionnan nobo cu ta ser crea cu e plan di rescate.

Gobierno ta trahando pa tuma Tele-Aruba over

ORANJESTAD(AAN)— Den medianan di comunicacion a ser relata como ponencia di Federacion di Trahadornan Arubano, den representacion di trahadornan emplea na Tele-Aruba cu Gobierno Insular lo ta negligiendo nan interesnan y cu apesar di varios intentonan lo no por a haya reunion cu gobernantenan di Aruba.

Diputado di informacion Frank Croes, muy en especial encarga cu traspaso di Tele-Aruba pa territorio insular di Aruba, riba esaki a duna di conoce cu al contrario na e ponencia ariba mencion na el a reuni cu FTA, y shopstewardnan di seno di Tele-vision un par di luna pasa.

Aki a keda combinan cu di banda di sindicato (lesa shop-stewardnan) lo entrega na Diputado Croes nan punto di bista encuanto un organizacion nobo pa nos planta televisora, cual plan pa reorganizacion te awe no a ser entrega, apesar cu Diputado Croes a recorda riba propio iniciativa e combenio haci pa haya mas rapido posibel idea di empleadonan al respecto.

Mas aun ta asina cu despues di un peticion pa otro reunion cual Diputado Croes a acepta, di banda di FTA esaki no a continua como cu a argumenta cu te ainda Tele-Aruba ta cay bao di Gobierno Central.

Sin embargo Diputado

Croes no a sinta keto pero a cuminsa analisa qui sistema lo por ta esun mas util pa laga nos planta televisora opera, teniendo debidamente cuenta cu e situacion financiero di tal planta ta leu do ta favorable y no por funciona na e manera actual mas si no ta pa medio di subsidio.

Como cu situacion financiero economico di Aruba ta existi pa analisa lo mas profundo posibel tur medio pa evita aumento den gastonan gubernamental, no por a bay un, dos, tres tuma over Tele-Aruba a sabiendad cu mester percura pa un subsidio basta substancial, cual na e momento aki ta ser cubri pa

Segui lesa pag. 6